

四庫全書

集部

欽定四庫全書

集部

蘇魏公文集卷二十二至
四

詳校官庶吉士臣朱理

檢討臣何思鈞覆勘

總校官進士臣朱鈞

校對官編修臣沈清藻

謄錄監生臣黃臣鵠

欽定四庫全書

蘇魏公文集卷二十二

內制

大皇太后賜門下詔

勅門下三朝盛會禮見羣臣王公造庭奉觴上壽皇帝
臨御五載恭己端莊慶集惟新受朝饗禮吾總攬幾務
叶助政綱雖克享治安而每懷抑畏今有司乃欲以天

宋 蘇頌 撰

聖故事行會慶稱賀之儀顧惟非涼豈敢比隆於先后
其在典法亦當稽合於常規是日皇帝致賀於禁中羣
臣奉表於東廡足以顯邦家之慶而形孝敬之風何必
外朝乃為具體來年正月一日更不御殿受賀上壽候
皇帝御殿禮畢百官並內東門拜表故茲詔示想宜知
悉

賜太子太保致仕張方平乞免明堂陪位允詔

勅方平省所上表免明堂陪位事具悉朕涓吉季秋有

事太寢祇嚴聖考陟配上神百辟諸侯咸肅雍於肆祀
四朝舊德宜顯相於清明暨閱奏封堅辭疾老諒久安
於閭里重遠涉於道塗姑徇至懷益延上壽可免赴闕
陪位故茲詔示想宜知悉秋熟卿比平安好遣書指不
多及

許詔

勅方平覽所上表免明堂陪位事具悉卿宣明九德左
右四朝解紱傳家結廬近甸三歲大事宗祀明堂粵惟

庶工莫不來助矧我舊老當相王儀忽覽封章之陳懇
辭筋力之憊重煩者哲姑聽便安益固冲和用介壽祉
可免赴闕陪位故茲詔示想宜知悉秋熟卿比平安好
遣書指不多及

賜新除中大夫守尚書左丞韓忠彥辭免恩命不
允詔

勅忠彥省所劄子奏辭免恩命事具悉卿才推時棟世
載王勲先帝所知朕嘗倚用地官主計已阜邦財省轄

提綱擢參國論顧僉言之惟允在眷注之尤深其聽訓
言亟踐乃位所請宜不允故茲詔示想宜知悉

不許詔

勅忠彥省所劄子奏辭免恩命事具悉卿以棟榦之材
歷藩朝之寄勤勞著於兩鎮典領載於六曹擢置近司
俾承省務乃欲祈於避位豈未體於注懷雖嘉歎之不
忘固恭謙之難徇往輔予治毋煩固辭所請宜不許故
茲詔示想宜知悉

賜新除中大夫守尚書右丞許將辭免恩命不允

詔

勅許將省所劄子奏辭免恩命事具悉卿擢自甲科素推國器先朝簪橐之舊已試其才二丞綱紀之司乃命以位蔽自朕志無若爾宜勿至固辭以煩多訓所請宜不允故茲詔示想宜知悉

賜正議大夫知樞密院事安燾特給假候母親稍

安日供職詔

勅安燾省三省奏據卿狀近為母患未安曾上表劄子
乞罷知樞密院除一在京宮觀差遣未賜允許乞進呈
事卿位冠樞衡任隆體貌近緣親疾祈解政幾乃眷英
髦方仰成而致治固嘗誨諭俛夙退以問安再閱叙陳
備形態至慮闕先嘗之餌特推予告之恩卿其悉心寧
於視膳竚聞病間即造朝趨其體至懷無煩屢請可特
給假候母疾稍安日供職故茲詔示想宜知悉

賜起復正議大夫知樞密院事安燾上表辭免恩

命不允詔

勅安燾省所上表辭免起復恩命事具悉卿民宗國器
先帝輔臣殫竭一心勤勞八載本兵之政方倚於弼成
鉅創之哀奄罹於變故既踰易奠之制宜有奪情之恩
何執禮之不渝乃上封而固請雖喪期有數難遽抑哀
而王事所埤當從權制所請宜不允故茲詔示想宜知
悉

不許詔

勅安燾覽所上表辭免起復恩命事具悉執親之喪情
何有極體國之意忠不可忘卿早以經綸之才久參樞
筦之政惇然在疚猶爾踰時禮固有奪情之文爾尚堅
銜恤之志封章茹痛雖諒於至誠墨經從權亦從於故
事勉副倚成之眷亟還機宥之司所請宜不許故茲詔
示想宜知悉

賜新除翰林學士朝奉郎知制誥蘇轍辭免恩命
不允詔

勅蘇轍省所劄子奏辭免恩命事具悉論思侍從之臣
翰林乃朕之極選文章論議之美當時則爾有重名已
歷職於詞垣復試能於省部良嘉敏譽擢在禁嚴况伯
仲之代選亦朝廷之榮觀辭之以義雖諒乃誠用值其
才固無所避所請宜不允故茲詔示想宜知悉

賜尚書吏部侍郎范百祿進撰成詩傳補注二十

卷獎諭詔

勅百祿省所上表撰成詩傳補注二十卷裛緝繕寫離

為二十冊上進事具悉夫六義之文蓋溫柔敦厚之教
四家之說有訓詁傳箋之殊雖同出於先儒或有非其
本義是使後學各務名家卿博識洽聞留心經術討論
之外尤深於詩攬商周之盛衰攷毛鄭之得失補注其
畧綯次成書真得作者之微頗助學官之闕奏篇來上
講解甚明研味之餘嘉歎無已故茲獎諭想宜知悉

賜正議大夫知樞密院事安燾生日詔

勅安燾卿稟天粹氣輔政累年方首秋鳴鶴之辰乃吉

夢維熊之旦載頒醪餼用助燕私享此多儀介以繁祉
今賜卿生日羊酒米麪等具如別錄至可領也故茲詔
示想宜知悉

賜正議大夫門下侍郎孫固生日詔

勅孫固侯屬首秋月惟初吉實哲輔挺生之旦有上臺
寵錫之恩厚牢醴之豐盈助家庭之燕喜往承渥惠用
介壽康今賜卿生日羊酒米麪等具如別錄至可領也
故茲詔示想宜知悉

賜同知樞密院事趙瞻生日詔

勅趙瞻仲冬初吉良輔挺生方陪幄之與謀記射蓬之
襲慶錫以牢醴助其燕私益介多祥以贊予治今賜卿
生日羊酒米麩等具如別錄至可領也故茲詔示想宜
知悉

賜新除檢校司空充保康軍節度使知潞州苗授
辭免恩命不允詔

勅苗授省所劄子奏辭免恩命事具悉卿稟溫嚴之氣

有沉毅之謀擢領十連入長三衛惟拱護周廬之重加
訓齊卒乘之勤方倚宿名遽辭苦疾閔煩戎政特徇雅
懷易節制於房陵析麾符於上黨中外均勞之寄可謂
優隆偃息藩軍之餘無妨頤養復覽遜辭之奏何其謙
畏之深雖嘉乃誠難從所欲所請宜不允故茲詔示想
宜知悉

賜門下侍郎孫固再上劄子陳乞致仕不允詔

勅孫固省所再上劄子奏陳乞致仕事具悉繼覩來奏

備述至誠既以氣血愈衰為言又以公論不容為懼三復厥旨良用疚懷卿早事先朝位登樞宥之冠入輔台德任隆喉舌之司僅閱歲期偶愆和裕將懇祈於謝事冀自弭於思憂且股肱大臣進退係乎國體寒暑微疾休告具於令文勉專精神毋重憂畏佇聞勿藥之喜入副惟幾之咨所請宜不允故茲詔示想宜知悉

賜新除中大夫同知樞密院事趙瞻辭免恩命不

允詔

勅趙瞻省所劄子奏辭免恩命事具悉卿蚤以才謀擢
於要劇忠言讜論見稱二帝之朝武畧文經翼我萬樞
之務與聞國政已閱歲期特推進位之恩益重本兵之
寄尚形固避難即爾從所請宜不允故茲詔示想宜知
悉

賜新除吏部尚書傅堯俞辭免恩命不允詔

勅堯俞省所奏辭免恩命乞知絳州事具悉卿舊德老
成中外矚望再持邦憲屢告嘉謀朝有正臣朕所倚賴

天官大選久難其人今以命卿允協公論何為遜寵乃欲出麾雖云執謙實昧朕意急服厥職毋用固辭所請宜不允故茲詔示想宜知悉

賜新除試御史中丞梁燾辭免恩命不允詔

勅梁燾省所奏辭免恩命事具悉卿才推敏明世篤忠厚再登坡省有彌縫袞職之勞擢長憲臺竚綱紀朝廷之益已布綸命遽閱需封夫進無偏私何傷於去就言盡誠實豈廢於廉隅宜推是心亟踐乃位無或固執以

稽朝僉所請宜不允故茲詔示想宜知悉

賜觀文殿大學士光祿大夫知永興軍韓縝上表

並劄子陳乞致仕不允詔

勅韓縝省所上表並劄子陳乞致仕事具悉先帝大臣
朕所尊禮矧惟元老嘗秉大鈞宣力四朝有勞王室內
總百揆著謨明弼諧之忠出殿三秦有鎮靖威懷之裕
方圖碩哲為我翰垣再閱封章願還印鞅夫引年謝事
雖據禮經而體國愛君豈忘雅意宜念始終之義毋煩

懇懇之辭益茂遠猷姑安厥服所請宜不允

不許詔

勅韓縝覽所上表并劄子陳乞致仕事具悉卿勤勞四
朝登翊三事先帝用之為棟榦國家賴之如股肱向解
政幾出臨藩服咸秦千里豪強戢其風威羌夏二陞種
落歸其轡馭何屢形於削牘祈還上於印章况耆老傳
家有不得謝而忠臣在遠猶不忘君今卿精力方強志
慮彌劬體我注意尚宜悉心毋至多言難從爾欲所請

宜不許

賜保寧軍節度使知大名府馮京進奉坤成節馬

詔

勅馮京覽所進奉坤成節馬一十匹事具悉露囊慶節
諒同寓縣之歡台鉉舊賢方倚都圻之守遠致材駒之
貢來充宰旅之歸嘉乃傾輸良深睠矚故茲詔示想宜
知悉

賜中大夫守中書侍郎劉摯生日詔

勅劉摯日離維斗天生上才出為王國之華任屬政綱
之務載臨慶日茂介壽祺言頌燕飫之儀用助祝延之
會今賜卿生日羊酒米麪等具如別錄至可領也故茲
詔示想宜知悉

賜中大夫守尚書右丞許將生日詔

勅許將時維冬令日在斗維是生王佐之賢適協陽來
之序萬機預職六射屆辰出肴醴於上方助燕私於家
會今賜卿生日羊酒米麪等具如別錄至可領也故茲

詔示想宜知悉

賜中大夫同知樞密院事趙瞻乞陝西一郡不允

詔

勅趙瞻省所劄子奏不嚴火禁致焚官舍伏望特除陝西一郡事具悉卿業蘊將明任參宥密屬鬱攸之為沴蓋興阜之弗虞奚為引愆乃求去位况樞衡之所寄方竚於遠猷誠意之雖堅難從於爾欲姑安厥位以副朕懷所請宜不允故茲詔示想宜知悉

賜知樞密院事安燾上第二表辭免起復恩命不

允詔

勅安燾省所再上表辭免起復恩命事具悉春秋之義不以家事辭王事人臣之大節也卿久贊樞機備宣誠亮自聞家難每念愴傷雖深鞠育之恩豈忘荃宰之寄况喪禮從變既苦寢之逾時經義甚明當墨衰而從事煩疏封之再至終朝制之莫違益揚名而顯親是謂孝之合禮所請宜不允故茲詔示想宜知悉

不許詔

勅安燾覽所再上表辭免起復恩命事具悉乃眷樞臣
久任朝政協贊惟幾之務倚注方深自罹何恃之艱哭
踊斯畢恩從權奪國有故常再觀封章懇祈終制雖居
喪盡禮懷念母之至情而移孝資忠亦為臣之大義宜
體深眷亟復近司所請宜不許故茲詔示想宜知悉

賜起復正議大夫知樞密院事安燾上第三表辭
免起復恩命許終喪制允詔

勅安燾省所三上表辭免起復恩命事具悉君子不奪
人之喪仁之至也卿以儒學起家以忠純許國方委樞
柄奄罹親喪既終奠虞當用詔起墨衰從事禮有權宜
苴麻盡哀情在難奪卿既內懷於鉅痛朕亦重違於至
情良嘉達孝之心聽遂善居之志特依所請許終喪制
故茲詔示想宜知悉

許詔

勅安燾覽所三上表辭免起復恩命事具悉三年之喪

百王之所同而古今之所一也自聞銜恤奄忽踰時向
之起卿蓋有權制卿之執禮良出哀情雖任重鴻樞倚
注方切而痛深樂棘抑奪誠難姑徇至懷益嘉純孝特
依所請許終喪制故茲詔示想宜知悉

蘇魏公文集卷二十二

欽定四庫全書

蘇魏公文集卷二十三

宋 蘇頌 撰

內制

賜新除門下侍郎劉摯辭免恩命不允詔

勅劉摯省所劄子奏辭免恩命事具悉卿敏識周才宣
力中外自預幾政屢告嘉謀南省西臺動為故事擢居
東掖時乃次遷惟茲喉舌之司益重腹心之寄亟就厥

位母煩固辭所請宜不允故茲詔示想宜知悉

賜孫固辭免轉官知樞密院事不允詔

勅孫固省所劄子奏辭免恩命事具悉卿向在先朝嘗
摠幾宥委柄去位於茲累年暨處東臺又復踰歲老成
之德中外式瞻還長西樞乃原舊職本兵之政方竚遠
猷辭劇之言無煩至再所請宜不允故茲詔示想宜知
悉

賜新除中大夫守中書侍郎傅堯俞辭免恩命不

允詔

勅堯俞省所劄子奏辭免恩命事具悉卿德器人流久
推士論四朝綿歷荐著事功其在班聯最為耆舊朕高
選近輔預政西臺無若汝宜遂命以位剡章來上畏寵
為言已諒乃誠宜毋固避所請宜不允故茲詔示想宜
知悉

賜通議大夫新知亳州鄧溫伯不許辭免龍圖閣

學士詔

勅溫伯省所奏蒙恩授龍圖閣學士乞賜寢罷事具悉
卿文苑宿名禁林舊望服衰去位中禫終喪往分譙社
之符仍進義圖之序始優耆哲均重輔藩遽上奏封過
自退託矧久勞於侍從固宜厚於寵章其即欽承以副
眷待所請宜不允故茲詔示想宜知悉冬寒卿比平安
好遣書指不多及

賜新除中大夫守中書侍郎傅堯俞辭免恩命不

允詔

勅堯俞省所再上劄子奏辭免恩命事具悉中書政本
大命所基自非通才莫稱斯任以卿有忠嘉之論士議
所歸使之預丞弼之謨僉言惟允奚自退託欲避寵榮
雖由爾衷殊昧朕意已行之命宜即欽承所請宜不允
故茲詔示想宜知悉

賜殿前副都指揮使武康軍節度使劉昌祚獎諭
詔

勅昌祚樞密院奏勘會卿前任涇原路經畧安撫使奏

請經營措置奉行朝旨專切置局根括打量到隴山一帶及安化縣復置弓箭手地上并招刺印到人馬事眷彼隴山控於平夏異時疆場之警介在阨隘之衝卿向以武才出按邊瑣圖上方畧奉行新書封畛既明卒乘斯復遂俾戎亭之境永無甌脫之虞繫爾有勞紓我西畧故茲獎諭想宜知悉

賜外任臣寮進奉謝恩馬詔

勅某省所進奉謝恩授某官并賜月俸公使馬共四匹

事具悉卿初拜恩綸言輸貢物惟是右牽之駿用將致
遠之誠再省忠勤不忘嘉歎故茲詔示想宜知悉冬寒
卿比平安好遣書指不多及

賜太師平章軍國重事文彥博四上劄子陳乞致
仕示諭詔

勅彥博省所四上劄子陳乞致仕事具悉朕纂服之初
任賢圖舊以卿躬富道德昔有勲勞輔相我祖宗位冠
羣后思見其風采名自別京尊以上公委之重務謀謨

四載終始一心方有賴於耆明乃屢辭於事任雖詔書
敦諭對見面言而不奪之誠久而彌篤浩然之志固難
必留屬以氣候凝寒道塗涉遠深虞偃薄靡遂便安姑
俟及於春和即議從於所欲尚宜勉強以副優隆故茲
詔示想宜知悉

又詔

勅彥博覽所四上劄子陳乞致仕事具悉卿仁祖之舊
相社稷之元臣位冠台司勲在王室功成謝事士望尤

高向特起於燕居俾輔成於初政忠言密議固多軍國之謀請老告歸疊有封章之邈不轉之志其堅若山雖駟馬安車當遂里閭之佚而增冰積雪尚艱道路之寒須及中春議從所欲姑體至眷尚安厥居故茲詔示想宜知悉

賜戶部尚書呂公孺乞致仕不允詔

勅公孺省所上表伏望檢會前奏乞致仕事具悉地官之長省務尤繁爰擇時髦總領邦計卿朝之舊老世載

忠規尹正王畿早聞治效均節財用實竚猷為何遽引
年遂欲謝事士有致於為政雖嘉乃誠時方藉於耆明
難從所欲姑安職業用副眷毗所請宜不允故茲詔示
想宜知悉

不許詔

勅公孺覽所上表伏望檢會前奏許致仕具悉卿公卿
華胄經濟通才宣力四方藹然治績典司六職總彼邦
財心計有聞齒髮彌壯何屢陳於奏牘遂欲去於里閭

雖援據禮經良嘉止足而益埤王事方賴老成尚安厥
官以副予意所請宜不許故茲詔示想宜知悉

賜保寧軍節度使知大名府馮京上表乞致仕不

允詔

勅馮京省所上表為年七十陳乞致仕事具悉古者大
夫有還政傳家之禮時之元老乃同心一體之臣進退
之間豈限常格矧卿年耆德茂為近著之表儀位重任
隆守北門之管鑰顧惟都會之地方賴保釐之功何為

抗章遽欲謝事雖懷謙知止深嘉明哲之風而圖舊尚賢未體朝廷之意惟勉遵於事守副委屬於予衷所請宜不允故茲詔示想宜知悉春寒卿比平安好遣書指不多及

不許詔

勅馮京覽所上表為年七十陳乞致仕事具悉卿擢甲科於仁祖之世輔大政於先皇之朝文物典章載於臺閣號令風采布於藩宣方提節制之師外委北門之管

年德兼茂體力素強何嫌而上封引禮而告老雖嘉知
止之分未副任賢之方尚專精神務近醫藥坐鎮樂俗
綏安遐邇克終遠猷時乃嘉績所請宜不許故茲詔示
想宜知悉春寒卿比平安好遣書指不多及

賜西蕃邈川首領河南軍節度使阿里骨進奉回

詔

勅阿里骨省所差人進奉事具悉卿保有封域作我翰
垣遠致風宜入充貢式言念傾輸之志良增眷獎之懷

卿所進生金乳香象牙硃砂碼碯等各依例估價就整
回賜錢銀綵絹故茲詔示想宜知悉春寒卿比平安好
遣書指不多及

賜御史中丞梁燾辭免兼侍讀不允詔

勅梁燾省所奏蒙恩除兼侍讀伏望特寢誤恩事具悉
卿文館舊賢士林偉望立朝多補袞之益執憲有直繩
之風朕登用者儒入助講學闕疑資訪方延褚馬之才
俞往汝諧難徇桓彭之遜往祇成命傾竚嘉言所請宜

不允故茲詔示想宜知悉

賜知大名府馮京進奉興龍節馬并冬節馬詔

勅馮京省所進奉興龍節馬一十匹并冬節馬二匹事
具悉卿中鉉者英北門重寄向屬天正之序繼臨星渚
之辰載擇材駒入充貢式嘉乃傾輸之意益深注想之
懷故茲詔示想宜知悉春暄卿比平安好遣書指不多
及

賜侍衛親軍步軍副都指揮使徐州觀察使知渭

州劉舜卿進奉賀冬節并賀正馬詔

勅舜卿省所進奉賀冬并賀正馬各一匹事具悉正至稱觴適效貢嘉乃帥垣之長載差地產之良遠致連編益彰忠蓋故茲詔示想宜知悉春暄卿比平安好遣書指不多及

賜保寧軍節度使知大名府馮京再上表乞致仕不允詔

勅馮京省所再上表陳乞致仕事具悉貴德尚齒先王

之令猷入輔出藩大臣之常職朕尊優者哲委任事為
輟卿坐鎮於朔陞彼俗方安於善教何乃徇大夫之禮
必欲致為政而歸在進退之則然顧簡注之宜異難從
所守當體茲懷毋或重言以煩多訓所請宜不允故茲
詔示想宜知悉春寒卿比平安好遣書指不多及

不許詔

勅馮京覽所再上表陳乞致仕事具悉卿文學政事名
重於朝廷器識才謀功宣於巖廟方委北門之管總臨

中冀之區何遽厭於事權屢請還於印紱雖引年避位
良高止足之風而經遠殿邦茲賴耆明之望再披章牘
深亮冲謙宜體至懷尚安厥職所請宜不許故茲詔示
想宜知悉春暄卿比平安好遣書指不多及

賜保寧軍節度使知大名府馮京辭免加恩不允

詔

勅馮京省所上表辭免加恩事具悉昨者宗祀禮成神
釐施普惟卿先帝樞衡之舊方守北門管鑰之嚴雖不

在顯相侍祠之班而遠修公侯助祭之式加地進律固宜先於庶工遜爵辭封何遽形於需奏時乃常典毋煩多言其體至懷亟成服命所請宜不允故茲詔示想宜知悉春暄卿比平安好遣書指不多及

不許詔

勅馮京覽所上表辭免加恩事具悉惟我弼臣為國良翰九筵宗祀雖不與陪祠之勤四海職來抑亦有助祭之貢禮成之慶恩數有常其在臣工咸均於况施矧卿

舊老何疑而遜辭毋持過謙其即祇命所請宜不許故
茲詔示想宜知悉春暄卿比平安好遣書指不多及

賜新除護國軍山南西道節度使守太師開府儀

同三司河中興元尹潞國公文彥博辭免兩鎮

恩命不允手詔

省所劄子奏辭免兩鎮恩命止以本官致任事具悉卿
四朝重望七紀高年朝廷之所仰成夷夏之所靳嚮浩
然歸志確乎莫留閔勞以幾政之煩俾遂其燕居之適

三公典冊兩鎮節旄皆所以尊禮帝師褒顯耆哲雖非
外庭大臣之比抑有先朝念舊之恩矧卿謝事而歸佚
老宜異比之將相之任職固無權寵之為嫌何其過謙
乃欲辭避宜悉茲意亟對徽章所請宜不允付彥博

不許手詔

覽所劄子奏辭免兩鎮恩命止以本官致仕事具悉爵
位崇高在禮宜加於異數公師進退推恩抑有於隆名
矧卿德齒之尊職秩之重弼亮四世始終一心告老之

章凡數十上優賢之命恨無以加故以蒲梁之節旄俾
光伊洛之里第况有前比固非過私毋煩遜辭宜即膺
受所請宜不許付彥博

賜新除護國軍山南西道節度使守太師開府儀
同三司河中興元尹潞國公致仕文彥博辭免
冊禮允詔

勅彥博省所劄子奏今以舊官致仕乞免行冊禮事具
悉名位不同禮亦異數上公之行冊命蓋有舊儀來奏

之辭寵章願如前請自非趣向之高遠渠能遜慙之再三省閱之餘嘉歎無已所請宜允故茲詔示想宜知悉

許詔

勅彥博覽所劄子奏今以舊官致仕乞免行冊禮事具悉國家尊上公之秩為帝者之師命數有加冊禮尤重六登上衮三拜維垣再致為政而歸懇避臨軒之寵良嘉謙德特徇至懷所請宜許故茲詔示想宜知悉

賜保寧軍節度使知大名府馮京三上表陳乞致

仕不允斷來章詔

勅馮京省所三上表陳乞致仕事具悉貴德尚齒帝王所以禮高年尊賢任能朝廷所以圖舊德矧在耆哲時方仰成致為臣而歸卿固欲潔去就之分煩官職之事朕亦思得忠嘉之謨雖屢閱於封章必難從於雅志卿其深體眷意勿忘公家保釐我朔都鎮綏我邊裔無輕進退益茂猷為今差入內侍省東頭供奉官勾當內東門司馮世寧賜卿詔書及茶藥各一銀合至可領也

所請宜不允仍斷來章故茲詔示想宜知悉春暄卿比平安好遣書指不多及

不許斷來章詔

勅馮京覽所三上表陳乞致任事具悉公卿大臣中外所屬進退之際去就非輕職閒無事則或許引年任重有守則難言佚老矧卿年耆德茂名大位尊論舊則輔翼於先朝語寄則居留於朔甸雖欲自便諒非所安三復來章徒嘉致懇尚當體朝廷之意豈在言筋力之勞

勉安舊邦宜停後請今差入內內侍省東頭供奉官勾當內東門司馮世寧賜卿詔書及茶藥各一銀合至可領也所請宜不許仍斷來章故茲詔示想宜知悉春暄卿比平安好遣書指不多及

賜皇弟賀禮畢答詔

勅某王朕遵先王之舊章躬季秋之大享祇見上帝配嚴禩宮方竣事於路朝遽披文於奏幅再嘉謹禮益喜
早成

賜在外公主賀禮畢答詔

勅某人陽館親祠遂逆釐於神貺祭封上奏慶已事於宗祈嘉彼懿親率由禮則披省之際褒歎在懷

賜內中公主賀禮畢答詔

勅某公主朕即明堂布政之宮展嚴父配天之祀薦裸斯畢神人以和汝適在幼齡習聞盛典露章稱慶率禮良嘉

賜吳楚國安仁賢壽夫人張氏賀禮畢答詔

勅某氏比者卜秋之季吉日惟辛並享帝親既燔牲玉
宮庭之舊儀典惟詳馳上慶函深嘉能事

賜貴妃苗氏以下賀禮畢答詔

勅某氏早事先朝著表儀於宮禁逮茲宗祀載順美於
封章形於溫綉之詞見乃恪恭之範省闕于再褒尚尤
多

賜內中慶國夫人竇氏以下賀禮畢答詔

勅某氏奠玉合宮親展三年之祀貽彤內屬恪居衆職

之先邁此休成普同贊喜再披來奏益顯盡恭

賜內中左右直御侍郎君掌賓王氏已下賀禮畢

答詔

勅某氏等早序禁庭克勤內職宗祀方行於鉅典慶成
爰上於封章再披贊美之詞茲見恭勤之意

欽定四庫全書

蘇魏公文集卷二十三

蘇魏公文集卷二十三

欽定四庫全書

蘇魏公文集卷二十四

宋 蘇頌 撰

內制

賜五臺山寺僧正省奇以下獎諭勅書

勅五臺山十寺僧正省奇等覽所進奉坤成節功德疏
等事具悉眷彼仁祠奠茲臺岳集慶門之清衆祝誕日
以延洪載閱疏封良嘉誠懇今賜省奇等紫僧衣一對

絹二十匹故茲獎諭想宜知悉秋熱各比清休否遣書指不多及

賜前兩府并待制以上知州初冬衣襖詔勅書

勅某清風戒寒獻良裘而在御邇臣守位殿藩服以方勤禦茲霜律之嚴宜有衣章之賜既安且燠益體予衷今賜卿翠毛細錦旋襪一領至可領也故茲詔示想宜知悉冬寒卿比平安好遣書指不多及

賜諸路知州職司及總管鈐轄至使臣衣襖勅書

勅某肅祇朝寄外恪官箴式臨寒律之初用錫功裘之
寵服茲純麗毋憚凝嚴今賜汝紫羅錦旋襪一領至可
領也故茲詔示想宜知悉冬寒汝比好否遣書指不多
及

賜諸路蕃官及溪洞蠻人初冬衣襖勅書

勅某汝恪居邊土祇服朝經爰及歲寒持加時賜寵被
纒繒之麗益勤忠順之方賜汝方勝練鵲大錦旋襪一
領至可領也故茲詔示想宜知悉冬寒汝比好否遣書

指不多及

賜諸路屯駐駐泊就糧本城諸軍員寮等初冬衣

襖勅書

勅某州諸軍員寮等冬律方升良裘始獻爰念扞城之
旅特推賜服之恩被此衣章毋忘固圉今賜汝等初冬
衣襖餘從宣命指揮故茲詔示想宜知悉冬寒汝等各
比好否遣書指不多及

賜于闐國進奉勅書

勅于闐國黑汗王省所差人進奉某物事具悉卿守在
西陲心馳上闕爰遣梯山之使荐修任土之儀深諒乃
誠不忘予意所進到物色今就整回賜錢二百貫文馬
依估價回賜錢五十貫文以浙絹充並交付差來大使
黎撒囉瞎征等至可領也故茲詔示想宜知悉秋熟卿
比平安好遣書指不多及

賜于闐國示諭勅書

勅于闐國黑汗王省所差人來進奉大使黎撒囉瞎征

等進奉到某物事具悉卿遠馳信介入覲王庭效川珍
岳貢之勤厚地產風宜之品特隆報賜用荅忠嘉黎撒
囉瞻征等進奉到上件物今依估價就整回賜錢一萬
五千貫文故茲詔示

賜于闐國男進奉勅書

勅于闐黑汗王男丙令滯根省所差人進奉某物事具
悉汝夙稟教忠采勤向化因使人之來覲展方物以効
勤省闕之餘嘉稱在念所進到物色今就整回賜錢五

十貫至可領也故茲詔示

賜西南蕃程以途等進奉勅書

勅程以途省所附進馬二匹擅二領事具悉汝世守封疆心馳象魏歷涉遠道來貢風宜載認忠勤良多歎尚
今回賜汝紅中錦夾旋襪腰帶衣著至可領也故茲示諭想宜知悉冬寒汝比好否遣書指不多及

賜南平王李乾德加恩制誥勅書

勅南平王乾德近以季秋仲辛稱秩元祀禮成太室澤

被綿區眷言分土之臣不懈勤王之職純誠益著信賞攸先加地進封載隆命數承神之惠深厲忠規今差使臣齎卿加恩制誥付廣西經畧司令於界首就賜到可祇受兼賜卿國信物等具如別錄至可領也故茲示諭想宜知悉冬寒卿比平安好遣書指不多及

賜西南蕃龍以利等進奉勅書

勅龍以利省所附進馬二匹朱硃二十兩壇二領事具悉汝守封遐域嚮義中華款塞來庭效珍修貢忠勤弗

替嘉歎良深今回賜汝紅中錦夾旋襪一領八兩渾金
鍍銀腰帶一條衣著一十五匹至可領也故茲示諭想
宜知悉冬寒汝比好否遣書指不多及

賜西蕃邈川首領河西軍節度使阿里骨加恩制

誥詔勅書

勅阿里骨國家講禮九筵獲奉帝親之享大賚四海用
廣神明之休乃眷世臣宿勤貢職爰推祭澤寵進官儀
當體至懷即欽成命今賜卿制誥到可祇受故茲詔示

想宜知悉冬寒卿比平安好遣書指不多及

賜知渭州劉昌祚等進奉助明堂馬詔勅書

勅昌祚等省所進奉助明堂馬五十匹事具悉宗祀配天國家之大事職來助祭臣子之至誠乃眷守藩之良勤修任土之式載觀厥貢深諒爾衷故茲詔示想宜知悉冬寒卿等各比平安好遣書指不多及

賜南平王李乾德歷日勅書

勅南平王乾德朕克謹天戒敬授人時眷乃炎陬被我

聲教奉若新書之告遵修嗣歲之宜率俾提封共知叶
紀今賜卿元祐五年歷日一卷至可領也故茲示諭想
宜知悉冬寒卿比平安好遣書指不多及

賜外任臣寮進奉坤成節功德疏詔勅書

勅韓縝覽所進奉坤成節功德疏一軸銀軸頭事具悉
卿任分守土義切愛君秋令協時適紀誕彌之慶真乘
演法遠輸善祝之誠披閱嘉歎不忘予意故茲詔示想
宜知悉冬寒卿比平安好遣書指不多及

賜溪洞進奉賀明堂并興龍節及冬正溪布示諭

勅書

勅彭儒武省所進奉賀明堂并興龍節及冬正溪布共
六十匹事具悉汝介居裔土向慕華風越川陸之修塗
展歲時之方貢忠勤備至歎尚不忘故茲示諭想宜知
悉冬寒汝比好否遣書指不多及

賜知大名府馮京進奉賀明堂禮畢馬詔勅書

勅馮京省所進奉賀明堂禮畢馬二匹事具悉近以禮行

太室澤霈綿區荷上神並况之仁繫羣后職來之助卿
國之耆哲外守都圻不忘象闕之心遠致材駒之貢省
閱之際注想尤深故茲詔示想宜知悉冬寒卿比平安
好遣書指不多及

賜徐州觀察使知渭州劉舜卿進奉賀明堂禮畢
馬詔勅書

勅舜卿省所進奉賀明堂禮畢馬五匹事具悉近以宗
祀合宮布澤綿宇乃眷藩方之列固多職助之勤逮此

慶成允修貢式益彰虔恪良用嘉稱故茲詔示想宜知
悉冬寒卿比平安好遣書指不多及

賜五臺山十寺僧正省奇等進奉龍節新正功

德疏獎諭勅書

勅五臺山十寺僧正省奇等省所進奉興龍節并新正
功德疏等事具悉適屆誕辰繼臨嗣歲眷靈山之淨衆
演竺土之真文延祝彌勤嘉歎于再今賜省奇等紫帽
衣一對絹二十四故茲獎諭想宜知悉冬寒各比清休

否遣書指不多及

賜溪洞進奉賀元祐二年三年四年興龍節端午

冬溪布勅書

勅向永勝省所進奉賀元祐二年三年四年興龍節端
午冬節溪布共四十五匹事具悉汝介居疆裔恪奉朝
經歲時之貢不愆風土之宜沓至益堅恭順深體忠勤
故茲示諭想宜知悉春寒汝比好否遣書指不多及

批荅

賜新除右光祿大夫知樞密院事孫固辭免恩命
不允斷來章批答

省表具之卿老成重德久任近司昔在先朝已長樞柄
比圖宿望入踐東臺忠諒之心始終弗替再踐帷幄方
竚遠謀繼上封章懇辭寵命惟朕志之先定矧成命之
已行雖諒由衷抑難從欲所請宜不允仍斷來章

不許批答

覽表具之樞機之政方藉舊賢封章之陳欲辭新命惟

卿德業之茂久副士民之瞻表儀近司師僉允穆母事
為謙之守副予注意之隆往服恩徽矜觀遠畧所請宜
不許仍斷來章

賜新除守門下侍郎依前中大夫劉摯辭免恩命
不允斷來章批荅

省表具之昔龍筦納言帝命惟允在今台輔之任茲惟
喉舌之司自西省而次遷蓋柄臣之更踐以卿儒林舊
德足以遠繼於古人何其露奏陳情乃欲固辭於成命

朕言已布謙守難從所請宜不允仍斷來章

不許批荅

覽表具之中書政事之本黃門出納之司皆為輔臣共
幹幾務以卿文學行義為時宗工更踐二臺實允羣望
奚過持於抑畏乃控露於懇誠雖嘉遜爵之高難廢出
綸之命所請宜不許仍斷來章

賜新除護國軍山南西道節度使守太師開府儀
同三司河中興元尹潞國公致仕文彥博上第

二表辭免兩鎮恩命不允斷來章批荅

省表具之貴德尚齒三代所以事老更加等出封九命
所以尊牧伯卿祖宗輔相朝廷表儀三冠台衡七換旄
鉞故事留於臺閣威名愴乎戎夷再陟師垣言歸里第
功名既遂恩禮宜殊特加雙節之榮以寵上公之去繼
披需奏願襲舊蕩雖明哲所存不移於素守而老成得
謝固異於昔時宜體至懷勿復多避所請宜不允仍斷
來章

不許批荅

覽表具之卿以天下之望輔相祖宗之朝以元老之猷
再起里閭之逸左右初政勤勞五年多士仰之如蒼龜
朝廷尊之為師保力辭大任復歸舊廬三公職儀已極
師臣之重兩鎮旄鉞猶有前詔之加假茲貴名示以殊
禮何封章之屢抗援故事以為言雖遜爵之誠則然顧
宗賢之禮具異宜無固執亟服新恩所請宜不許仍斷
來章

賜新除中大夫守尚書左丞韓忠彥辭免恩命不

允斷來章批荅

省表具之卿慶門毓德近著躋榮內外踐揚績用尤著
擢居承輔實允僉言遽覽奏封載形謙叙惟朕志之先
定方嘉汝賢况省務之難停尚何所避所請宜不允仍
斷來章

不許批荅

覽表具之二轄之任四輔維均嘗歷選於時材宜莫如

於世德稟金籙之訓諒家學之不忘詠緇衣之詩乃國人之所好往就厥職毋勞固辭所請宜不許仍斷來章
賜門下侍郎孫固上第二表乞致仕不允斷來章

批答

省表具之朕臨御丕圖聿懷先帝疇咨近輔思用舊人
昨起卿於近藩遂任卿以大政庶幾謀議尚有典刑近
屬與和屢求去位詔書敦勉仍予告以養頤封章繼聞
復力言於疲沓初則有謝事引年之請重之以忘公廢

禮之憂再味遜辭實為過慮惟寢興之自護副歲月之
仰成即俟痊平毋煩懇懇所請宜不允仍斷來章

不許批荅

覽表具之卿儒林舊老先帝輔臣重外居多復政未久
偶緣膚腠之病遂有丘園之思屢抗封章堅不回於素
守再頒詔諭仍優給於假休復覽需章力言曠事矧朝
廷之待近弼豈責以筋力之勞而律令之於大臣亦分
於予賜之告其少安於燕處毋深念於職憂雖諒至誠

難從雅志所請宜不許仍斷來章

賜新除殿前副都指揮使武康軍節度使劉昌祚

上第一表辭免恩命不允批荅

省表具之卿早以武才帥於戎閫綏懷羌右有長轡遠
馭之謀鎮靖疆陲得輕裘緩帶之體錄其邊最名以鋒
車授英節於梁洋委親兵於環衛出命惟允何名以辭
即宜拜恩往服厥職所請宜不允

不許批荅

覽表具之近以東求環尹慎付節旄眷彼才臣久勤戎
畧督護諸將寬明得於士心綏附三陲威信行於羌種
擢居高衛允副僉言遽閱奏章固辭恩命雖嘉所守難
即爾從所請宜不許

賜新除中大夫同知樞密院趙瞻辭免恩命不允

斷來章批荅

省表具之夫名位不同設官所以峻廉陞歲月累久序
進所以旌勤勞况乎預議樞衡朕所體貌既觀宣力之

效故有加等之遷官次當然爾其母避所請宜不允仍
斷來章

不許批荅

覽表具之國家慎重名器以待賢能既得其人乃命以
位卿預本兵之政固已有勞推進秩之恩蓋示優禮宜
亟就位母或過辭所請宜不許仍斷來章


賜新除中大夫守尚書右丞許將辭免恩命不允

斷來章批荅

省表具之士之立朝豈不為道朕之注意亦欲仰成既嘉卿中外治蹟之優故任以左右省綱之寄宜據學緼輔我政幾毋或固辭竚觀遠業所請宜不允仍斷來章

不許批荅

覽表具之卿文學有以高世議論有以過人入輔出藩多歷年所代言視草再直禁林已觀詳試之能遂擢丞疑之任何其謙慮欲避寵章體予至懷往欽成命所請宜不許仍斷來章



蘇魏公文集卷二十四

欽定四庫全書

集部

蘇魏公文集卷二十五
七至

詳校官庶吉士臣朱理

檢討臣何思鈞覆勘

總校官進士臣朱鈐

校對官編修臣沈清藻

謄錄監生臣黃臣鵠

欽定四庫全書

蘇魏公文集卷二十五

內制

賜太師文彥博辭免恩命不允批荅

省表具之朕之祀明堂也蓋奉遵於先憲卿之相仁祖也預講定於大儀旌嘉顯相之勞抑有故常之典眷言元老特峻寵章惟是泛恩豈為異數何執謙之彌固以

宋 蘇頌 撰

遜爵而為言雖受命益恭有古賢之茂範而尊師重傅
蓋朕意之所期宜體至懷即膺褒策所請宜不允

不許批荅

覽表具之古聖王之治天下也貴德而尚老所以篤君
親之義而崇忠厚之風卿輔相四朝嚮用五福謨明弼
諧則臯陶伯益乃其比康寧壽考雖太公衛武無以加
人所具瞻有如巖石爰因大需是用褒尊毋煩謙執之
堅深體眷毗之意所請宜不許

賜文彥博上第二表辭免恩命不允斷來章批荅
省表具之朕嘗觀周漢之君皆有耆老之佐畢公之弼
亮四世桓榮之尊為五更恩禮所加可謂盛矣卿道德
名世文武濟時輔相我祖宗逮茲四紀左右我文母不
愧前人因宗祀以推恩蓋舊章之當爾未為異禮夫何
足辭雖勤慤之誠見於累牘而神明之惠難徇至懷宜
畧謙撓往欽新命所請宜不允仍斷來章

不許批荅

覽表具之卿以經緯之高才為廊廟之重器權衡百職
柱石四朝輔成王業如周公奉行故事如魏相功名兩
極恭慎架加近以鴻祀禮成湛恩雲施乃眷元老再推
寵章加進戶封抑惟常典懇辭名級再抗封章惟歎褒
之在懷固循從之莫遂其體隆眷亟往欽承所請宜不
許仍斷來章

賜李瑋苗授上第一表辭免恩命不允批荅

省表具之昔仁宗之祀明堂也復希闕不講之典故推恩

特異今朕之躬大饗也用郊丘三歲之制故行慶有常而卿以節制之崇領郡牧之寄預顯相之列增加封食抑惟舊章胡然遜辭蓋出謙重已行之命宜即欽承所請宜不允
不許批荅

覽表具之國家敬恭神事祇率舊章三歲親祠禮莫為重四海來祭物無不共方仲辛之禮成推大澤以雲布凡百卿士普同慶休矧乃殿邦之賢侍祠之官位為節制之重爰加大命以廣靈休適觀奏封尚蕪遜避言綸

已布寢罷固難所請宜不許

賜平海軍節度使駙馬都尉李瑋上第二表辭免

恩命不允斷來章批荅

省表具之朕稱秩元祀事天承親欽翼溫恭備盡誠孝
推廣神惠霈及邇遐以卿外館之親陪祀惟恪增之邑
賦之廣益以真食之多胡然克謙欲遜光寵披閱來奏
不忘歎嘉莫遂允俞宜即欽受所請宜不允仍斷來章

不許斷來章批荅

覽奏具之卿素蘊才猷復聯姻戚早膺節制之寵久奉
內朝之班陪預宗祈勤恭夙夜逮告成於盛禮爰推錫
於渙恩增衍戶封蓋出常典遽閱需章之奏極陳遜避
之辭雖嘉乃誠固難如請所請宜不許仍斷來章

賜新除中書侍郎傅堯俞辭免恩命不允斷來章

批荅

省表具之朕咨用柄臣以輔台德惟賢是任豈計素資
卿歷事四朝早著謨明之效載總六職屢觀典領之能

右省近司方得君重是宜據發於素蘊助予宣布於政
條乃執謙撓尚辭寵命姑體至眷亟就新班所請宜不
允仍斷來章

不許斷來章批荅

覽表具之卿早以時望任於顯塗內之臺省之煩外之
州使之劇宣力滋久稱譽日聞擢陞右弼之聯且專內
史之務贊揚命令實賴猷為不必固辭重違予意所請
宜不許仍斷來章

口宣

賜新除中大夫同知樞密院事趙瞻辭免恩命不
允斷來章批荅口宣

有勅卿自聯基宥屢告謀猷朕嘉爾勞擢進厥位毋煩
固避其即欽承

賜新除中大夫守尚書左丞韓忠彥辭免恩命不
允斷來章批荅口宣

有勅卿人地並高才謀已試擢登左轄允叶僉諧其即

欽承用副虛竝

賜新除中大夫守尚書右丞許將辭免恩命不允

斷來章批荅口宣

有勅卿文雅望隆猷為效著擢其材實實在省綱卿其
勿辭趣宜就職

賜皇叔徐王顥生日禮物口宣

有勅卿惟叔父之尊位冠宗藩之首處家自得樂聞為
善之言誕日載臨禮有匪頌之式丕承異數茂集繁禧

宣召新除內翰蘇轍入院口宣

有勅卿儒學名家賢科特起試之左戶已彰周敏之才
擢在內庭更竚論思之益亟趨嚴直用副虛懷

賜大遼賀坤成節人使銀鈔鑼等口宣

有勅卿等肅將使指慶誕節之屆辰修講隣歡弭聘旃
而伊始式頒器服之品用助寢興之勤

班荆館賜大遼賀坤成節國信使副到闕酒果口

宣

有勅卿等張旃修聘涉悠道以良勤夙駕趨朝次近郊而伊始載頌醪核式示眷懷

賜皇叔祖宗景以下罷散坤成節道場香酒果口

宣

有勅卿等國之宗英慶逢誕節集筮乾之勝利祝文母之永年載認傾輸特加錫予

賜殿前副都指揮使苗授以下罷散坤成節道場

香酒果口宣

有勅卿等提兵之要宿衛於朝邁宗慶之誕辰演迦文之密義助茲贊祝宜有頌宣

賜駙馬都尉李瑋以下罷散坤成節道場香酒果

口宣

有勅聖母誕辰幅員同慶乃眷列侯之貴共祈萬壽之祥既集勝緣特加蕃錫

就驛賜大遼賀坤成節人使內中酒果口宣

有勅卿等肅馳使乘言戾都亭載惟行李之勤特出醪

羞之錫少將恩意式示眷私

坤成節就驛賜于闐國進奉人御筵口宣

有勅汝等貢琛向闕就館歷時慶逢載誕之辰禮厚示
慈之燕想承恩渥共集歡榮

班荆館賜大遼賀坤成節人使回程酒果口宣

有勅卿等已竣使事言趣歸程方飲餞於都門宜寵頒
於燕品少勤履跋式示恩章

賜殿前指揮使劉昌祚赴闕沿路茶藥口宣

有勅卿夙戒輕車遠趨名節惟關河之跋履冒風露之
淒清特頒茗餌之良用慰道塗之久

就驛賜于闐國進奉人朝辭御筵口宣

有勅汝等遠馳驛傳致貢風宜逮茲旋軫之期特有加
邊之惠用勤行李式示恩私

賜皇弟祁國公佖生日禮物口宣

有勅卿以介弟之愛昨諸公之封屬秋仲始生之辰加
康侯庶錫之寵服予恩數增爾壽祺

賜劉昌祚辭免恩命不允批荅口宣

有勅卿師帥之才稔於衆聽殿巖之職蓋以次遷雖嘉避寵之誠難返已行之命

賜劉昌祚辭免恩命斷章批荅口宣

有勅提禁旅於殿中分節旄於閫外爰擢才望並付事權無用固辭以稽成命

送伴賀興龍節使副沿路與賀正旦人使相見傳

宣撫問口宣

有勅卿等張旃入境頓節在塗方匱薄於寒風想勤勞
於次舍特加恩喻少恤于行

送伴賀興龍節使副沿路與接伴賀正旦使副相

見傳宣撫問口宣

有勅卿等講修隣聘馳邁使華適臨凝冽之辰少勤行
李之役爰加問勞用慰道途

閣門賜平章軍國重事文彥博加恩告口宣

有勅合宮展采已畢帝禋涓日告庭即頒顯冊帝師國

老恩數惟優就錫綸函用昭眷禮

閤門賜宰相呂大防加恩告口宣

有勅季秋歷吉太室肇禋翕受繁祉需為大澤眷言上
宰首舉慶章就錫命書往欽神惠

閤門賜徐王加恩告口宣

有勅朕虔恭大祀對越上神縟禮告成湛恩溥浹眷言
叔父之貴特崇命數之優已告大庭往欽惠渥

閤門賜嗣濮王宗暉郡王宗隱宗愈國公宗楚宗

祐加恩告口宣

有勅總章裡祀翕受純禧端闕頌常即孚霈澤眷宗藩之尊屬加采邑之戶封就賜恩書用昭禮遇

閤門賜殿前副都指揮使劉昌祚加恩告口宣

有勅祭有大澤以惠庶工乃眷帥臣寵加爵命明庭大告僉言允諧賜以命書宜即祇受

閤門賜節度李瑋加恩告口宣

有勅竣祠陽館發號雉庭眷言外館之親列在東旄之

著已頒渥典孚告外朝往其欽承副予恩意

白溝驛賜大遼賀興龍節人使御筵并傳宣撫問

口宣

有勅卿等使傳及闕候人在界眷言跋涉宜安少休爰
錫燕觴用勤行李

賜太師平章軍國重事文彥博上第一表辭免恩

命不允批荅口宣

有勅熙事備成中外蒙福眷言冢弼恩有常均用廣神

休不為異數雖嘉謙抑難即徇從

賜太師文彥博第二表不允斷來章批荅口宣

有勅大祀推恩首褒元老需章避寵深認至懷蓋惟神
惠之祥宜自公台而始其即膺受無煩再三

賜皇伯祖嗣濮王宗暉皇叔祖華原郡王宗愈安

康郡王宗隱鞏國公宗祐鄖國公宗楚上第一

表辭免加恩不允批荅口宣

有勅祭有惠澤命已告庭眷彼宗英進加封戶何其謙

挹而欲遜辭雖嘉乃誠難從所欲

不允斷章批荅口宣

有勅訖成大報翁受純禧誕舉慶恩用褒近戚封章再
上謙巽深堅成命已行至誠難徇

賜門下侍郎孫固中書侍郎劉摯同知樞密院事

趙瞻尚書左丞韓忠彥右丞許將上第一表辭

免恩命不允斷來章批荅口宣

有勅卿典儀奉祀極齋慎之勤恭益地推恩示神休之

溥博茲惟惠澤奚必遜辭宜即欽承毋稽成命

賜皇弟大寧郡王必遜寧郡王佶咸寧郡王俱普
寧郡王似祁國公僖上第二表不允斷來章批

答

有勅朕逆釐上神灑澤綿宇方舉褒親之命再觀避寵
之章雖諒冲懷難從至請宜即祇受不必再三

賜殿前副都指揮使劉昌祚保康軍節度使苗授

上第二表辭免恩命不允斷來章批答口宣

有勅近緣宗祀誕布慶恩眷彼帥臣朝有褒典再披奏
幅過守謙冲命已告庭理難從欲

賜平海軍節度使駙馬都尉李瑋上第一表辭免
恩命不允批荅口宣

有勅需神之澤禮典具存辭寵之言謙撓乃過惟爾近
戚宜被徽章勿固避辭往即祇受

賜皇伯祖嗣濮王宗暉生日禮物口宣

有勅卿賢世嗣封主大邦之宗事陽爰將復記載誕之

初辰就頒車服之儀用助門閭之慶服茲寵數祝以壽
康

賜太師文彥博乞致仕不允批荅口宣

有勅眷惟元老位為師臣忽覽封章復欲去位矧方倚
重無至多言

賜太師文彥博生日禮物口宣

有勅帝師國宰誕日載臨尊酒燕肴寵頒加厚體茲眷
禮續爾壽祺

雄州撫問大遼賀興龍節使副口宣

有勅卿等隣邦修好使傳在塗方涉沍寒少休次舍想
惟安適深副眷懷

趙州賜大遼皇帝賀興龍節使副茶藥口宣

有勅卿等修塗于邁華傳良勤眷方冒於風霜命往頒
於茗餌節宣其氣茲有助焉

賜皇弟遂寧郡王生日禮物口宣

有勅眷彼維城之貴時予同氣之親良月就盈初生在

旦備物加賜俾壽而昌

蘇魏公文集卷二十五

欽定四庫全書

蘇魏公文集卷二十六

宋 蘇頌 撰

內制

撫問資政殿學士光祿大夫知定州張瑛口宣
有勅卿頃避政機出臨邊閭適及嚴凝之序方勤宣布
之宜諒協綏康良深矐矐

撫問觀文殿學士知潁昌府范純仁口宣

有勅卿近辭柄弼出屏圻封鎮綏一方翕受多福特加
問勞式慰晤思

白溝驛賜大遼賀正旦人使御筵兼傳宣撫問口

宣

有勅卿等聘旃將命修塗方冒於風霜郵館迂賓式燕
少勤於行李諒惟安適深副眷懷

撫問知河南府李清臣知永興軍韓縝口宣

有勅卿輟自近班出分外寄歲聿云暮職思其憂宜慎

節宣以副眷矚

撫問陝西轉運使副兼涇原秦鳳熙河蘭岷路緣

邊臣察及賜諸軍特支口宣

有勅卿

汝

等出司外服恪守官經職事少勞歲寒匪懈更

宜慎護副我眷懷

相州賜大遼賀興龍節使副御筵口宣

有勅卿等肅將使指嗣講隣歡衝冒風霜暫休傳舍特
頒燕衍少勞車徒

冬節就驛賜阿里骨進奉人御筵口宣

有勅汝等恭修方貢適憩都亭爰臨長至之辰宜集多祥之慶就頒燕禮以示恩私

班荆館賜大遼賀興龍節人使到闕御筵口宣

有勅卿等使傳斯來都門少止念驅馳於郵置正區薄於風霜特賜燕肴聊勤徒御

班荆館賜大遼賀正旦人使到闕御筵口宣

有勅卿等肅將聘禮來慶歲元眷言行李之勤已及旬

圻之近特陳郊勞俾洽歡娛

相州賜大遼賀正旦人使回程御筵口宣

有勅卿等展幣元正已終於使事回轅北道再歷於會
藩燕以示慈行宜少止

賜河北西路諸軍春季銀鞋兼傳宣撫問臣寮將

校口宣

有勅卿等封疆之守夙夜在公各效爾勞想無他苦以

卿汝

時賜予示我眷懷

賜門下侍郎劉摯辭免恩命不允斷來章批荅口

宣

有勅卿邦之俊傑仕歷省臺黃闈論思政機委屬亟祗
成命以副僉言

賜知樞密院孫固辭免恩命不允斷來章批荅口
宣

有勅卿樞庭宿望復冠舊班言綍既行允副僉屬宜亟
就位毋或堅辭

賜新除中書侍郎傅堯俞辭免恩命不允斷來章

批荅口宣

有勅比圖時望登用雋良副貳西臺預聞大政毋煩多
避以副僉諧

瀛州賜大遼賀正旦人使回程御筵口宣

有勅卿等聘儀既已方飾于歸鞍春律尚寒載馳於北
道少留徒御就錫燕歡

賜大遼賀興龍節使副銀鈔鑼等口宣

有勅卿等建疆來暨授館云初乃眷寢興之勤特加服
器之錫式將禮意用表恩私

賜皇伯嗣濮王宗暉以下罷散興龍節道場香酒

果口宣

有勅卿宗室近親朝班上列遘丹陵之誕日崇西竺之
勝因嘉乃精衷錫茲宴品

賜大遼賀興龍節人使辭訖酒果口宣

有勅卿等修聘成儀北轅有日言念道塗之邈良多橐

載之勞爰即賓郵少陳宴餞

班荆館賜大遼賀興龍節人使回程御筵口宣

有勅卿等使節遐征聘儀畢奏屬歸驂之戒旦聊供帳
以餞行宜即郊亭少留車馭

賜宰臣以下罷散興龍節道場尚書省御筵酒果

口宣

有勅簪纓昕集共慶誕辰觴豆旅陳式頒宴禮載加醪
果之賜用助獻酬之歡

玉津園賜大遼賀興龍節人使射弓例物口宣

有勅射以觀德既集賓筵樂且有儀必資器備爰加寵
賚用助和興

班荆館賜大遼賀興龍節人使回程酒果口宣

有勅卿等拭玉成儀回轅戒道屬冒遠衝寒之始備析
醒可口之珍聊用頒霑庶昭禮意

賜大遼賀興龍節人使內中酒果口宣

有勅卿等持節茲來授館既定屬風霜之加凜資飲餌

之輔和頒錫有加恩意斯厚

賜大遼賀興龍節人使內中酒果口宣

有勅使傳造朝已達仁隣之好郵亭芟舍方休車從之
勞錫以珍甘助乎燕適

興龍節就驛賜阿里骨等進奉人御筵口宣

有勅汝等遠持歲貢慶我誕辰憩郵館以少休造王庭
而惟恪特頒宴飲用慰勤勞

賜大遼賀興龍節人使回朝辭訖歸驛御筵口宣

有勅卿等誕辰展慶已導於隣歡使傳言歸載頌於燕
會少延行館冀肅多儀

班荆館賜大遼賀正旦人使到闕酒果口宣

有勅元正肆會隣聘通歡眷使乘之馳郵憩都亭而頓
節言頌尊豆少勞車徒

賜皇弟普寧郡王似生日禮物口宣

有勅卿予之介弟早席王封當載育之令辰有匪頌之
寵數膺茲惠渥集乃善祥

賜大遼賀正旦人使鈔羅唾盂孟子錦被褥等口

宣

有勅卿等遠持聘幣來慶春朝方少憩於都亭宜有資
於器服特加頒錫用助寢興

皇帝御大慶殿受朝賀畢宣勞將士等口宣

有勅朕以元正協吉正宁受朝眷惟拱衛之聯咸預執
陳之列亦既竣事宜各番休將士等好在否

撫問成都府利州等路臣寮口宣

有勅卿等分寄藩方思憂職守逮此凝嚴之候想多夙
暮之勞宜各安強副我眷委

賜大遼賀正旦人使春幡勝口宣

有勅青陽司啓芳歲發春節物惟華風宜所紀特頒使
介俾襲時休

賜大遼賀正旦使副歲除日酒果口宣

有勅歲律崢嶸天時凜冽眷使華之授館講聘好以肄
儀錫以醴肴少資燕飲

正月三日賜大遼賀正旦使副內中酒果口宣

有勅春朝協吉隣使講儀既已事於聘珪宜分頒於燕
實少安攸館庶協多歡

送伴正旦使副沿路與北朝生辰正旦使副相見

傳宣撫問口宣

有勅卿等聘圭已事夙駕言歸涉道路之悠長值風霜
之區薄眷惟行役各協康休

玉津園賜大遼賀正旦人使射弓例物口宣

有勅宴以勞賓射以觀德既嘉弓矢之審固宜有器服
之匪頒豈特旌能亦將成禮

正旦日賜大遼賀正旦人使酒果口宣

有勅卿等慶臨元朔使講隣歡既夙退於館垣特分頒
於醴實况茲寒粟少助燕休

雄州賜大遼賀正旦人使回程御筵口宣

有勅卿等使事既畢歸轅已遙將馳度於瓜亭宜少留
於星節特頒燕飲用慰道塗

正月六日賜大遼賀正旦人使朝辭訖歸驛御筵
口宣

有勅卿等拭圭展幣已畢聘儀還軫辦嚴特頒餞禮惟
是燕餽之具少勤徒御之行

賜大遼賀正旦人使正月一日就驛御筵口宣

有勅元正節屆鄰聘禮成眷使節之方休即館垣而延
竚佳辰共慶樂飲攸宜

賜大遼賀正旦使副朝辭酒果口宣

有勅卿等鄰聘已修陞辭云畢道途之役方促歸軒樽
豆之珍少資飲御

班荆館賜大遼賀正旦人使回程御筵口宣

有勅卿等三朝之慶已道隣歡四牡之歸特頒餞禮少
延衍樂式示私恩

班荆館賜大遼賀正旦人使回程酒果口宣

有勅聘儀云畢使馭言歸歷近甸以戒行冒餘寒而涉
遠芳醪美實載用頒霑

外國書

皇帝達太皇太后回大遼皇帝賀坤成節書

七月日姪孫大宋皇帝謹致書於叔祖大遼聖文神武
全功大畧聰仁睿孝天祐皇帝闕下執炬乘時遘親闈
之誕日占書講信欽隣國之彝儀已恭達於慈顏俾復
修於報禮其為感懌未易敷宣今保靜軍節度使蕭寅
等回專奉書陳謝不宣謹白

皇帝回大遼皇帝問候書

玉律回秋寶隣修好因乘輅之使介窺溢幅之書詞方
履初涼克綏繁祉更祈頤護用協願言

皇帝達太皇太后賀大遼皇帝正旦書

正月一日姪孫大宋皇帝謹致書於叔祖大遼聖文神
武全功大畧聰仁睿孝天祐皇帝闕下履正歲之元遠
修於隣好稟慈闈之訓嗣講於慶儀使指於行幣將其
意冀迎福嘏式協願言今差右朝議大夫試右諫議大
夫柱國南陽縣開國子食邑五百戶賜紫金魚袋韓正

彥供備庫使兼閤門通事舍人上騎都尉金鄉縣開國男食邑三百戶曹暎充太皇太后正旦國信使副有少禮物具諸別幅專奉書陳賀不宣

皇帝賀大遼皇帝正旦書

正月之吉繼敦睦於隣歡維春之初庶導迎於壽祉尚馳使介往致幣儀欣祝惟深喻言靡罄

皇帝回大遼皇帝賀正旦書

正月日姪孫大宋皇帝謹致書於叔祖大遼聖文神武

全功大畧聰仁睿孝天祐皇帝闕下歲更四氣之端禮
慶三朝之會隣邦講好載馳使乘之華函牘摛辭兼致
幣儀之厚緬惟眷睦第切感欣今長寧軍節度使耶律
寬等回專奉書陳謝不宣謹白

皇帝達太皇太后回大遼皇帝賀正旦書

月正元日歲祥允集於春朝國寶善隣書問兼陳於慈
幄恭因省侍具達音辭感懌之懷言文罔既

皇帝回大遼皇帝賀興龍節書

十二月日姪孫大宋皇帝謹致書於叔祖大遼聖文神武全功大畧聰仁睿孝天祐皇帝闕下星回周紀適臨震夙之辰歲聘講儀繼沐仁鄰之問特紆使指彌厚世歡欣感之深喻言莫究今奉國軍節度使耶律常等回專奉書陳謝不宣謹白

皇帝達太皇太后回大遼皇帝問候書

誕節屆期承遠馳於信使榮函示好兼致問於慈闈尋因省侍之間具達講修之意永言感懌靡逮文陳

皇帝賜夏國主進奉賀正馬駝回詔

詔夏國主省所差人進奉賀正馬駝共一百頭匹事具
悉春朝講禮外服輸忠走專使以來庭繫良蹄而在御
風宜所尚歲貢靡愆省閱之餘嘉歎良厚今回賜銀絹
茶等具如別錄至可領也其差來人所賜物色亦具賜
目故茲詔示想宜知悉春寒比平安好否書指不多及
太皇太后賜夏國主進奉賀正馬駝回詔

詔夏國主覽所差人進奉賀正馬駝共一百頭匹事具

悉眷惟列土之邦世奉勤王之職載臨元朔遠效貢珍
羈地產之奇毛實天閑之外廐言觀備物益見輸忠今
回賜銀絹茶等具如別錄至可領也其差來人所賜物
色亦具賜目故茲詔示想宜知悉春寒比平安好否書
指不多及

賜夏國主厯日詔

詔夏國主迎日推策校疎密於一周欽象授時紀便程
於四序眷言侯服作我翰垣爰錫小正之書俾興嗣歲

之務布宣於下共襲其祥今賜卿元祐五年曆日一卷
至可領也故茲詔示想宜知悉冬寒比平安好否書指
不多及

蘇魏公文集卷二十六

欽定四庫全書

蘇魏公文集卷二十七

宋 蘇頌 撰

內制

明堂奏告太廟八室冊文

維元祐四年歲次己巳九月戊辰朔十三日庚辰孝曾
孫嗣皇帝臣某謹遣某官臣某敢昭告於僖祖文獻睿
和皇帝伏以德厚流光發祥自遠子孫萬世以顯以承

顧惟眇躬克荷隆構季秋吉卜宗祀明堂前飭攸司祇
嚴裸獻惟誠克孝庶或享之謹以嘉玉量幣柔毛剛鬣
明粢薌合薌萁嘉蔬嘉薦清酌式達至誠文懿皇后崔
氏配尚饗

宣祖冊文

宣祖昭武睿聖皇帝伏以維天之命有開必先挺生真
人繼育神聖文謨武烈奄有多方式舉宗祀載懷祖德
先期備物用展孝思有非惟羞至誠是達昭憲皇后杜

氏配

太祖冊文

太祖啓運立極英武睿文神德聖功至明大孝皇帝伏
以運當五季天祐下民上聖膺期光宅四海削平多壘
載張皇綱肆及非涼獲承統業祇循祖武敢怠時思享
嘗大庭前期裸獻遣臣攝事尚監茲誠孝惠皇后賀氏
孝明皇后王氏孝章皇后宋氏配

太宗冊文

太宗至仁應道神功聖德文武睿烈大明廣孝皇帝伏
以武定天下文致太平盛德成功重規疊矩子孫承繼
方夏謚寧時維季秋霜露既肅大庭宗祀清廟告虔祇
荐苾芬用達誠懇率禮弗越維其右之淑德皇后尹氏
懿德皇后符氏明德皇后李氏元德皇后李氏配

真宗冊文

皇高祖考真宗膺符稽古成功讓德文明武定章聖元
孝皇帝伏以祖宗受命維皇繼之禮樂告成于時備矣

保和戎狄勒崇岱宗治道粲然敷遺後嗣季秋大享夙
展時思永言保之福祿攸降皇高祖妣章懷皇后潘氏
皇高祖妣章穆皇后郭氏皇高祖妣章獻明肅皇后劉
氏皇高祖妣章懿皇后李氏配

仁宗冊文

皇曾祖考仁宗體天法道極功全德神文聖武睿哲明
孝皇帝伏以崇道尚德持盈守成四紀君臨萬方底定
仁霑動植恩及蠻夷翼子謀孫後世永賴涓卜秋季祇

事上神荐告宗祧用嚴孝享皇曾祖妣慈聖光獻皇后
曹氏配

英宗冊文

皇祖考英宗體乾膺歷隆功盛德憲文肅武睿神宣孝
皇帝伏以昊天曷命文祖受之至德升聞萬方歸往靈
承前烈汜致隆平通駿有聲用開厥後顧惟眇質獲嗣
丕圖宗祀路庭陟配昭考聿嚴薦享用達衷精庶幾顧
歆永綏福祿

神宗冊文

皇考神宗英文烈武聖孝皇帝伏以聖德神功文經武
緯臨御四海十有九年修己安民仁霑恩洽肆惟寡昧
荷茲燕貽大享總章祗修嚴配先辰荐裸庶達孝思
表

皇帝宿齋第一日問太皇太后聖體表

臣某言齋幄端誠恭致總章之祀寢門問膳阻趨宗慶
之朝定省以時晨昏在念仰惟興止彌固福禧

問皇太后聖體表

臣某言奉堂筵之大享預潔齋居侍晨夕之溫顏少違
慈幄興言視膳惟切馳誠慎御太和益介丕祉

問太妃牋

某言禮嚴宗祀方潔慮於精明躬遠慈顏闕問安於晨
夕乃誠眷戀不捨斯須仰惟興居克保休福

皇帝齋宿第二日問太皇太后聖體表

臣某言合宮致孝禮先內外之齋西朝問安心結晨昏

之戀迨茲越宿阻於承顏益御天和永隆邦祉

問皇太后聖體表

臣某言交於神明將奉帝親之享思其志意載嚴祭祀
之齋瞻望庭闈不遑朝夕仰惟比日燕御安和

問皇太妃牋

臣言嚴父配天屬謹齋祠之恪晨羞夕膳少違就養之
方宮閭非遙瞻言尤切屆茲霜序順履歲祥

皇帝為禮畢謝太皇太后表

臣某言肅若舊典大庭具舉於宗祈燕及皇天文母誕膺於繁祉惟是熙成之備率由慈訓之隆省侍非遙慶欣兼集

謝皇太后表

臣某言講三歲親祠之典奉季秋大享之儀宗祀禰宮克配上帝遂慶成於熙事蓋承訓於親庭即獲瞻承倍深慶豫

謝皇太妃牋

某言季秋仲辛大庭宗祀上帝是享文考配神惟鉅典之休成本慈躬之訓助即還寧省竊抃衷悰

明堂禮畢奏謝內中諸殿閣三清諸聖等表

伏以歷吉季秋展祠陽館躬執珪幣並享帝親荷神靈之顧歆蒙貺施之均溥永思昭報敢怠衷精

明堂禮畢奏謝內中欽先殿諸帝后表

伏以三歲親祠國之大事合宮禋享月以季秋祇薦上神陟配昭考竭至誠於備物祈厚福於黎元荷天降祥

已事如禮敢忘翼勵仰荅靈休

諸帝后等陵奏謝明堂禮畢表

臣某言近以季秋仲辛明堂大享獲休成於熙事賴敷

祐於明神言念貽謀后云先慈敢忘勵翼即陵宮而展報冀

冥鑒之丕昭恭達孝思永期福祚

明堂禮畢奏謝諸陵帝后表

伏以禮行世室遵嚴父配天之文澤布寰區遂協氣祥
風之應實孫謀之燕翼致熙事之備成顧惟眇冲敢忘

祇率式陳薦報冀達精誠

明堂禮畢奏謝內外諸神廟嶽瀆等處表

伏以合神事於內朝聿嚴宗祀致燎煙於太一遂底熙成荷錫羨之降康實敷天之蒙福仰惟靈祐相此成儀是罄芳馨不忘貺施

明堂禮畢奏謝內外諸宮觀表

伏以大事在祀躬展享親之儀精意曰禋克遵配帝之典薦盥云畢神靈居歆汜此休成率繫沖貺爰致吉蠲

之報永孚穹昊之休

永厚陵等處泥皮墜落修完奏告懿德皇后英宗

皇帝表

臣某言伏以式瞻陵闕近在都圻歲月屢遷風雨攸斲
禮有增飾工用巧墁興事之辰不敢不告臣無任精虔
激切之至謹差某官某奉表奏告以聞臣某誠惶誠懇
頓首頓首謹言

元祐四年十月日孝孫嗣皇帝臣某上奏永昌陵

下宮前殿廊屋等處疎漏奏告太祖皇帝表

臣某言伏以祇奉宗陵式嚴闕宇歲月滋久風雨攸侵
慮推剝於椽楹當繕完於土木恭因揆日敢告僉功臣
無任精虔激切之至謹差某官某奉表奏告以聞臣某
誠惶誠懇頓首頓首謹言

元祐五年二月日孝曾孫嗣皇帝臣某上奏罷散

朱表

臣某言近以霖雨不時原田寢害託居人上懼失農收

罄精禱於天神冀廓清於雲族芳薰始荐霽景遽開荷
陰隲之昭融致函生之泰豫有虔報禮式竚監觀祈萬
靈之降休俾庶證之時若益加嚴恪仰對明威

神宗皇帝忌辰朱表

臣某言永懷昭考遺弓劍以上賓始屬諱辰案科儀而
殖福延企列真之祐仰資仙馭之游采竭孝思虔希冥
助謹奉表奏告以聞臣某誠惶誠懼頓首頓首謹言

在外諸宮觀五嶽四瀆等處罷散明堂禮畢道場

朱表

臣某言近者殊庭荐鬯太室升煙克成帝享之儀實賴
淵宗之廢禮嚴昭報誠盡吉蠲仰依沖妙之功永祚丕
平之運

坤成節奏告內中露香表

伏以祗荷慶靈協臻泰定適屆誕彌之吉載殫精懋之
誠肅荐芬馨上通霄極庶回况施益嚮壽康

永昭陵神臺泥皮墜落奏告仁宗皇帝慈聖光獻

皇后表

臣某言伏以陵寢崇嚴墜塗完密偶茲推圮即用修墁
敢祇告於祠庭冀克寧於神宇仰瞻如在尚鑒茲誠

青詞

中太一宮謝晴青詞

嗣天子臣某謹遣某官臣某請道士三七人於太一宮
開啓謝晴道場七晝夜罷散日設醮一座二千四百分
位謹上啓元始天尊太上道君太一老君混元上德皇

帝近以常陰作沴淫雨彌旬下民其咨多稼將害因肅
嚴於真館期降格於昊穹精意上通膚雲遽斂感不旋
日實賴於神休歲亦有秋敢忘於美報尚繫沖廕冀底
登平無任懇倒之至謹詞

景靈宮天興殿雅飾了畢開光明奉安奏告聖祖

御容青詞

維元祐四年歲次己巳九月戊辰朔二十七日甲午嗣
皇帝臣某謹遣昭宣使和州刺史內侍省內侍押班管

勾景靈宮臣趙世長謹上啓聖祖上靈高道九天司命
保生天尊大帝伏以帝福萬世開景命於皇基道法自
然奉真儀於靖館屬載嚴於像飾用祇告於常居仰竚
飄遊即安邃宇寧神斯在介祉無疆無任懇倒之至謹
詞

西太一宮開啓神宗忌辰青詞

維元祐五年歲次庚午二月丙申朔五日庚子嗣天子
臣某謹遣供備庫副使管勾西太一宮臣任克明請道

士三七人於太一宮開啓神宗皇帝忌辰道場一月罷
散日設周天大醮一座二千四百分位謹上啓元始天
尊太上道君太上老君混元上德皇帝伏以先皇厭世
垂盛烈於無窮大道紫科荐洪禧於罔極式臨諱日預
叩真乘庶憑齋禱之功永助仙遊之邈無任懇倒之至
謹詞

中太一宮真室殿開啓祈雨道場青詞

維元祐五年歲次庚午二月丙申朔二日丁酉嗣天子

臣某謹遣入內侍省東頭供奉官勾當龍圖天章寶文閣臣王綬請道士三七人於中太一宮真室殿開啓祈雨道場謹上啓元始天尊太上道君太上老君混元上德皇帝伏以春為陽中萬物待資生之澤雨弗時若庶民懷焦亢之憂敢致潔於清場用祈靈於真室伏冀穹旻降鑒甘澍普霑獲五稼之豐登俾羣生之茂遂仰繫神貺克底時康無任懇倒之至謹詞

明堂前二日於景靈宮保寧閣上下分獻青詞

維元祐四年歲次己巳九月戊辰朔十二日己卯嗣皇
帝臣某謹遣翰林學士承旨光祿大夫知制誥兼侍讀
上護軍武功郡開國侯食邑一千二百戶臣蘇某謹上
啓聖祖上靈高道九天司命保生天尊大帝六位仙官
伏以涓季秋之仲辛奉大庭之宗祀禋類上帝升配禰
宮敢率祭儀恭陳荐禮無任懇倒之至謹詞

在外諸宮觀五嶽四瀆等處開啓謝明堂禮畢道

場青詞

維元祐四年歲次己巳某月某朔某日某甲子嗣天子
臣某謹遣某人請道士某人於江寧府茅山開啓明堂
禮畢道場某日罷散日設醮一座二百四十分位謹上
啓元始天尊太上道君太上老君混元上德皇帝近以
宗祀明堂克配上帝仰資沖蔭遂底熙成敢遵科醮之
儀昭達衷精之懇尚祈道妙敷祐邦圖庶臻泰定之祥
永荷清靈之貺

齋文

後苑華景亭開建謝晴齋文

維元祐四年歲次己巳九月戊辰朔二日己巳皇帝遣
入內侍省內東頭供奉官勾當後苑譚辰等請僧三
七人於後苑華景亭開建謝晴道場七晝夜近以候屬
秋成時恒雨若民憂害稼禮有崇門即禁籞之華林闕
祇園之淨會覺慈垂祐陰沍遽消載嚴贊唄之儀用荅
休嘉之應庶蒙神貺永庇人天謹言

相國寺開啓謝晴道場齋文

皇帝遣某官某請僧三七人於大相國寺大殿上開啓
謝晴道場七晝夜近以天作淫雨民閔有秋致禱仁祠
式殫精意祈覺皇之垂祐庶氛祲以潛消不越匪朝遽
升杲日丕顯諸方之應翕臻四氣之和再闢清場恭陳
謝禮庶蒙善利永庇含靈

後苑華景亭開建祈雨齋文

維元祐五年歲次庚午二月丙申朔二日丁酉皇帝遣
入內內侍省內東頭供奉官管勾後苑譚宸等請僧三

七人於後苑華景亭建祈雨道場伏以自冬徂春稍闕
滂沱之潤彼民望歲深懷愆亢之虞爰仗佛乘仰祈神
貺修舉六時之供導迎四序之和冀甘澤之霑濡俾嘉
生之茂遂緬維大覺昭鑒丹誠謹言

五臺山等處謝雨齋文

維元祐五年歲次庚午某月某朔某日某甲子皇帝遣
入內侍省內東頭供奉官李嗣元於五臺山請僧三
七人開啓謝雨道場啓告於文殊菩薩近以氣序愆陽

冬春閔雨恭禱羣望祇叩覺慈惟善應之無方召至和
而來格雷雨作解獲霑足於農疇力穡有秋遂慰安於
民望敢忘至懇仰荅鴻休謹言

祝文

五龍廟賜會應廟為額祭告五龍之神祝文

維元祐四年歲次己巳八月戊戌朔十日丁未皇帝謹
遣某官某致祭於五龍之神伏以雲行雨施實賴陰功
廟食壇祠抑惟舊典粵瞻靈宇載飾崇堂方屬考成特

加顯號神其安妥惠此黎元尚享

景靈宮天興殿雅飾了畢開光明奉安奏告聖祖

御容祝文

維元祐四年歲次己巳九月戊辰朔二十七日甲午孝
曾孫嗣皇帝臣某謹遣昭宣使和州刺史內侍省內侍
押班臣趙世長敢昭告於皇高祖考真宗膺符稽古成
功讓德文明武定章聖元孝皇帝伏以靈德在天豈忘
處語時思有廟虔奉衣冠屬增煥於睟儀冀即安於寧

宇恭陳薦告永譽燕詒尚享

五嶽四瀆等處祈雨祝文

維元祐五年歲次庚午某月某朔某日某甲子皇帝某
謹遣某官敢昭薦於東嶽天齊仁聖帝伏以春序方中
驕陽為沴託居人上深軫農收邈瞻靈祠虔致精禱伏
冀無方善應有滄上濟流膏澤而徧大田消祲氛而為
樂歲敢申至懇仰荷神休尚享

會應廟安掛牌額奏告五龍之神祝文

維元祐五年歲次庚午二月丙申朔二十八日癸亥皇帝謹遣左宣德郎知開封府倉曹叅軍公事史邈致祭於五龍之神伏以四靈之長時乘默助於化工五方之神廟祀特崇於顯號載嚴棟宇式表題顏敢告就工冀蒙後應尚享

天地社稷宗廟宮觀等處祈雨青詞祝文

維元祐五年歲次庚午三月丙寅朔四日己巳嗣天子臣某謹遣太中大夫守尚書左僕射兼門下侍郎上柱

國汲郡開國公食邑三千九百戶食實封一千戶臣呂
大防敢昭告於昊天上帝伏以雨暘弗若稍愆六氣之
和穀麥未滋慮失三農之望託居人上祇畏天明虔齋
被以致誠冀神靈之降祐霑滂沱之澤普浹原田廓氛
侵之祥化為樂歲將俾動植均蒙福休尚享

在京會應廟等處祈雨齋祝文

維元祐五年歲次庚午三月丙寅朔四日己巳皇帝謹
遣朝奉大夫試尚書刑部侍郎上護軍河南縣開國男

食邑三百戶賜紫金魚袋趙君錫恭告於五龍之神伏以驕陽為沴時雨稍愆庶民其咨嘉種將槁仰憑神化垂恤黔黎合膚寸之雲霓為大澤育來牟之實登乃有年彌罄精衷恭期善應尚享

五嶽四瀆等處為謝明堂禮畢祝文

維元祐四年歲次己巳十月某朔某日某甲子皇帝某謹遣某官敢昭荐於東嶽天齊仁聖帝近以度堂格廟嚴父配天克成宗祀之儀實賴神靈之祐式修報禮祗

秩祠宮冀錫純禧永庇蒸庶尚享

景靈宮分獻諸帝后祝文


維元祐四年歲次己巳九月戊辰朔十二日己卯孝曾
孫嗣皇帝臣某謹遣翰林學士朝奉郎知制誥上騎都
尉賜紫金魚袋臣蘇轍敢昭薦於宣祖昭武睿聖皇帝
伏以講三年之親祀將享合宮奉七世之宗祧式瞻原
廟崇嚴文考陟配上神祇荐苾芬庶殫誠孝尚享

五嶽四瀆等處奏謝明堂禮畢祝文

維元祐四年歲次己巳某月某朔某甲子皇帝某謹遣
某官敢昭薦於東嶽天齊仁聖帝伏以卜吉季秋肇禋
陽館既成熙事實賴神休載歎嚴祠式陳報禮冀垂歆
鑒永祐黎元尚享

景靈宮石橋安构欄子動土祭告里域真官祝文
維元祐四年歲次己巳十一月丁卯朔二十八日甲午
皇帝遣西京左藏庫使嘉州刺史入內內侍省押班管
勾景靈宮梁惟簡致祭於里域真官伏以崇嚴闕宇秘

奉真游屬有歌推再加完飾顧茲吉土主爾明神涓選
嘉辰敢告興事尚享



蘇魏公文集卷二十七